



**Mahein Nia Lian Nú. 53, 27 Maiu 2013**

## **Serbisu Militar Obrigatóriu iha Timor-Leste?**

### **Introdusaun**

Hodi realiza promesa ne'ebé halo tiha ona iha kampaña prezidensial, Prezidente Repúblika Timor-Leste estabese ona ekipa ida hodi halo sosializaun no estudu kona-bá serbisu militar obrigatóriu. Objetivu husi relatoriu ne'e hodi kontribui hanoin ruma kona-bá programa serbisu militar obrigatóriu liu-liu atu dezafia programa ida ne'e. Fundasaun Mahein (FM) kestiona ho razaun ne'ebé apresenta kona-bá introdusaun serbisu militar obrigatóriu iha Timor-Leste.

Bainhira Sr. Taur Matan Ruak (TMR) sai nu'udar kandidatu ba Prezidente Repúblika ba periodu 2012-2017, kandidatu TMR artikula serbisu militar obligatoriu nu'udar programa prinsipal ida ba programa polítika kandidatu ne'e nian. Durante tempu kampaña, kandidatu TMR defende katak serbisu militar obrigatóriu nu'udar programa kampaña número lima. Programa ne'e sai tiha ona nu'udar mehi ida kleur TMR nian, tan iha tinan 2007-2008, bainhira TMR kaer hela Komandu F-FDTL hatama proposta programa ne'e ba iha Parlamentu Nasional no Governu iha tempu ne'eba hodi hetan aprovasaun.<sup>1</sup> Maske, ikus mai laiha resposta ruma husi Governu no Parlamentu Nasional ba proposta TMR nian ne'e.

Bainhira kandidatu TMR eleitu nu'udar Prezidente da Repúblika (PR), hahu dudu programa ne'e. PR estabese ona ekipa ida ne'ebé lidera husi Gabinete PR nian hodi halo estudu komparativu no konsultasaun.

Iha razaun prinsipal tolu tansa FM kestiona ba programa serbisu militar obligatoriu. *Dahuluk*; tan razaun enkuadramentu legal, *daruak*; tan razaun prioridade polítika Governu nian kona-bá área siguransa no defeza, *datuluk*; tan razaun estratéjiku. Parte tuir mai iha relatoriu ne'e sei analiza no dezenvolve razaun sira ne'e hodi reforsa argumentu sentral relatoriu ne'e katak laiha razaun fundamental no klaru kona-bá programa polítika militar obrigatóriu husi PR.

### **Enkuadramentu Legal: Kompetênsia Prezidente Repúblika no Governu**

Serbisu militar obrigatóriu ne'e no kualker polítika defeza monu liu ba iha kompetênsia ezekutivu, la'os kompetênsia PR nian hodi formula fali polítika defeza nasional. Tuir lolos, iha kampaña kedas, programa serbisu militar obligatoriu labele sai nu'udar programa polítika PR nian, lolos Governu maka iha poder tomak hodi defini postura forsa defeza iha Timor-Leste.

Tuir Konstituisaun RDTL, Artigu 74 (Definisaun) hatete katak:

---

<sup>1</sup>Jornal Independente, Segunda 15 Marsu 2012

1. *Prezidente-República maka Xefe-Estadu, símbolu no garantia independéncia nasionál no unidade Estadu nian, no instituisaun demokrátika sira-nia funsionamentu regulár.*
2. *Prezidente-República maka Komandante Ass liu Forsas Armadas nian.*<sup>2</sup>

Tuir Konstituisaun RDTL Artigu 103, Artigu 107, no Artigu 108 hatete momos katak Governu maka iha responsabilidade atu define polítika no programa jeral nasaun nian.

Iha mos Lei Nú. 2/2010 de 21 de Abril Lei de Sigurança Naçional define ho hafahe ona ho klaru funsaun entre PR no Governu.

Iha Artigu 21 Lei Seguransa Nasional ne'e dehan katak PR ne'e iha deit kompetênsia hodi halo kontrolu ba sistema integradu ba siguransa nasional no reforsa tan deit kompetênsia sira ne'ebé hatur tiha ona iha Konstituisaun RDTL. Iha Artigu 23 defini ho klaru kona-bá knáar Governu nian ho formula polítika siguransa nasional.<sup>3</sup>

Haree husi padraun legal no konstitusional sira ne'e, PR laiha responsabilidade kona-bá formulasaun polítika defeza no siguransa nasaun nian, maibe, Governu maka iha poder tomak ba área ida ne'e. Ne'e katak programa ne'e lahan-malu tiha ona ho mandatu konstitusional nian ne'ebé ko'alia kona-bá separasaun poder ba xefe estadu no orgaun ezekutivu. Maibé, oinsa ho prioridade polítika defeza no siguransa Governu no programa militar obrigatoriu ne'e?

### **Dokumentu Polítika Governu Hatete Saida Kona-bá Militar Obrigatóriu?**

Dokumentu polítika ka *defence policy documents* ne'ebé ko'alia kona-bá área defeza maka: Dokumentu Plano Força 2020, Planu Estratéjiku Dezenvolvimentu Nasional no Programa V Governu Konstitusional 2012-2017. Dokumentu sira ne'e la temi ho kle'an kona-bá serbisu militar obrigatóriu iha Timor-Leste. Entaun, oinsa programa serbisu militar obrigatóriu PR bele iha ligasaun ho dokumentu polítika ezekutivu nian?

Iha dokumentu Plano Força 2020 ne'ebé Prezidente TMR maka inisiador bainhira kaer hela Komandu F-FDTL la estabelese postura forsa defeza militar obrigatóriu ida, dokumentu ne'e la hamosu argumentu ruma ho detallu kona-bá importânsia ba Timor-Leste hodi introdus konseitu serbisu militar obrigatóriu iha pensamentu estratéjiku nasaun Timor-Leste. Iha deit liña tolu resin iha pázina 136 koalia nune'e:

*"In the event of Compulsory Military Service is the chosen option, it will be advisable to create a small-scale domestic defence industry, with the aim of producing uniforms and footwear, dry rations, munitions and other military articles and basic necessities for use in training and development"(Força 2020, pázina 136).*<sup>4</sup>

---

<sup>2</sup> Konstituisaun RDTL Versaun Tetum

<sup>3</sup> Lei Nú. 2 /2010 de 21 de Abril Lei de Segurança Naçional

<sup>4</sup> Força 2020, pázina 136

Tradusaun la'os oficial:

*“Iha eventu bainhira servisu militar obrigatóriu mak sai nu’udar opsaun, karik bele kria indústria defeza nasional kiik ne’ebé ho objetivu hodi halo produsaun uniforme no kalsadu, rasaun maran, munisaun no artigu militar no nesessidade bázika hodi uza iha treinamentu no dezvoltimentu”.*

Parágrafu ne’e iha sentidu prinsipal ida katak Plano Força 2020 lataka dalan ba Estadu hodi hamosu servisu militar obrigatóriu iha Timor-Leste. Dokumentu ne’ebé la’os deit sai matadalan ba dezvoltimentu forsa defeza ba tinan lima, maibe tinan sanulu resin, tanba ne’e, tuir lolos artikula ona ho kle’an kona-bá importânsia introdusaun servisu militar obrigatóriu. Dokumentu ne’e la konsege, signifika katak TMR ne’ebé nu’udar inisiador ba dokumentu Plano Força 2020 lahare katak Timor-Leste presiza ema hotu-hotu tama iha militar. Programa ne’e la’os mosu deit nune’e, tenki iha mudansa jeeostratéjiku ruma ne’ebé dramátiku tebe-tebes iha rejiaun ne’ebé sisi Estadu hodi mosu ho konseitu servisu militar obrigatóriu. Maibe, iha rejiaun liu-liu nasaun viziñu Indonézia ne’ebé identifikadu nu’udar ameasa externa boot iha dokumentu Força 2020 iha mudansa boot tebe-tebes iha demokrasia, ekonomia no liu-liu mentalidade lideransa iha Indonézia. Situasaun jeeostratéjiku iha nasaun viziñu sira avansa tebe-tebes, maibe, pensamentu estratéjiku hodi hamosu planu servisu militar obrigatóriu halo fali *marça atrás*.

Planu Estratéjiku Dezvoltimentu Nasional (PEDN) mos uza nafatin Plano Força 2020 nu’udar matadalan hodi kondus Governu iha esforsa profesionalizasaun forsa defeza. Ne’e katak, pensamentu estratéjiku ne’ebé hatur tiha ona iha Plano Força 2020 sei sai nu’udar dokumentu úniku iha dezvoltimentu estrutura forsa defeza. Iha pázina 167 PEDN hatete nune’e:

*“The strategic study’ Force 2020” is Timor-Leste’s model for the consolidation and development of F-FDTL.....”(PEDN, pájina 167).<sup>5</sup>*

Tradusaun la'os oficial:

*“Estudu estratéjiku ”Força 2020” maka sai nu’udar modelu Timor-Leste nian ba konsolidasaun no dezvoltimentu F-FDTL....”.*

Ne’e katak to’o tinan 2020, Timor-Leste sei laiha tan ona konseitu estratéjiku seluk kona-bá dezvoltimentu F-FDTL.

Programa V Governu Konstitusional sai nu’udar tradusaun husi PEDN, no iha kontektu defeza nian, programa ne’e sai nu’udar tradusaun husi Plano Força 2020 ne’ebé estabesidu tiha ona desde tinan 2004. Iha Programa V Governu Konstitusional ne’e liu-liu iha parte defeza nian identifika buat sira ne’ebé ho natureza transnasionais ne’ebé bele hamosu impaktu negativu ba siguransa<sup>6</sup> hanesan krime organizadu, tráfikú ba droga, terrorismu, degradasaun ambiental, mudansa klimátika no dezastre natural sira.<sup>7</sup>

<sup>5</sup> Planu Dezvoltimentu Estratéjiku Nasional – PEDN - 2011-2030

<sup>6</sup> Iha mos observasaun ida katak mudansa klimátika, degradasaun ambiental no dezastre natural ne’e konstitui ameasa ba siguransa, tan ne’e parte ne’e tuir lolos tau prioridade ba ameasa ne’ebé sisi intervensaun F-FDTL tuir mandatu Konstitusional, artigu ne’e bele hare iha: *Francisco Lemos Dos*

Iha exersísio formulasaun polítika defeza Estadu ida nian, ameasa no interese estratéjiku maka determina estrutura forsa defeza nian. Haree ba ameasa ne'ebé temi iha programa ne'e, bele dehan katak laiha ameasa konvensional extraordináriu ida ne'ebé obriga Governu hodi halo planu re-adjustamentu ba modelu forsa defeza Timor-Leste.

Bazeia ba análise kona-bá dokumentu polítiku Governu nian ne'ebé iha mandatu konstitusional hodi defini polítika defeza nasional Timor-Leste la temi buat ida kona-bá serbisu militar obrigatóriu iha Timor-Leste. Tan ne'e, bele foti konkluzan katak programa serbisu militar obrigatóriu ne'ebé nu'udar programa polítika PR nian lahan-malu ho programa polítika Governu nian.

### **Oinsa Prespetiva Estratéjika Kona-bá Polítika Defeza?**

Tuir perspetiva estratéjika, rasionalizasaun kona-bá introdusaun militar obrigatóriu ne'e muktik hela. Sr. Frei Guterres, Asessor ba Casa Militar Prezidencia Repúblika haktuir nune'e:

*"S.E Presidente Repúblika hakarak implementa programa serbisu militar obrigatóriu ba foin-sa'e sira iha programa ida hanaran "Sidadania Sívika Patriota (SSP) ne'ebé iha objetivu hodi hasa'e sentidu nasionalismu no patriotismu, atu nune'e, kontribui ba defeza soberania no integridade territorial nasaun nia". Sr. Frei Guterres mos hatutan tan katak programa ne'e sei "haforti nasionalismu, sidadania, no hametin liutan konsiênsia foin-sa'e sira nian ba sociedade, hametin disiplina moral, kontribui ba halakon dezempregu no redus droga no krime sira ne'ebé iha relasaun ho arte marsiais".<sup>8</sup>*

Liña sira ne'e maka PR atual hatu'o nu'udar kandidatu iha kampaña polítika molok hakat ba eleisaun presidencial nian. Iha pontu prinsipál tolu iha rasionalizasaun ida ne'e; defende soberania no integridade territorial, kuda no hametin disiplina no hadok foin-sa'e sira husi hahalok krime sira no halakon dezempregu.

Hahu uluk ho pontu dahuluk kona-bá importânsia programa serbisu militar obrigatóriu ne'ebé hanaran fali, eufemistikamente, Sidadania Sívika Patriota. Razaun ida ne'e korresponde duni ho mandatu konstitusional F-FDTL Artigu 146 Konstituisaun RDTL ne'ebé ko'alia momos ona kona-bá funsaun F-FDTL hodi defende soberania no integridade territorial RDTL.<sup>9</sup>

Bainhira ema ida koloka argumentu nune'e signifika iha nasaun balu maka konstitui ameasa ba soberania no integridade territorial RDTL. Tanba, bainhira Estadu ida estabelese planu hodi estabelese postura forsa defeza ida obrigatóriu nune'e signifika Estadu ne'e iha, jeoestratéjikamente, hela iha ameasa konvensional boot balu nia laran. Entaun, se los ka Estadu ne'ebé los maka sai nu'udar ameasa konvensional ba Estadu Timor-Leste? Planu Força 2020 identifika Indonézia nu'udar ameasa externa ida boot<sup>10</sup>, maibe, tenki tau iha kalkulasaun estratéjiku katak Indonézia agora la'os ona Indonézia ida iha rejime Soeharto

---

Santos, *Programa V Governu latemi kona-bá polítika defeza foun* ba Timor-Leste! bele asesu iha: <http://forum-haksasuk.blogspot.com/2012/12/programa-v-governu-latemi-kona-ba.html>

<sup>7</sup> Programa V Governo Constitucional Nian, 2012-2017, pájina 71.

<sup>8</sup> Office of the Presidency, Press Release First Debate on Compulsory Military Service, April 29, 2013

<sup>9</sup> Konstituisaun RDTL Artigu 146

<sup>10</sup> Força 2020, pájina 17 "Types of Threat"

nia okos. Presiza duni rekuiñese katak bele hamosu mudansa lideransa iha Indonézia ka Timor-Leste ne'ebé bele tau iha risku relasaun amigável ne'ebé nasaun rua durante ne'e goja hela. Bele hamosu lideransa foun ne'ebé lakohi hakoi buat dodok sira iha pasadu maibe hakarak lori buat sira ne'e ba iha justisa formal hanesan tribunal internasional. Ne'e bele lori impaktu boot tebes ba dínamika relasaun entre nasaun rua ne'e nian. Bainhira moris ona iha ambiente ida nune'e, nasaun rua bele haree malu nu'udar ameasa konvesional boot ba siguransa. Karik ida ne'e maka nu'udar hanoin ka pensamentu ne'ebé dudu PR hodi hamosu programa Sidadania Sívika Patriota, entaun presiza esplika ho klaru iha rasionalizasaun programa ne'e.

Iha teoria barak ona maka ko'alia kona-bá interaksaun entre polítika doméstika no polítika externa. Iha situasaun balu, maski polítika ne'e internal, polítika ne'e bele iha implikasaun ba polítika externa Estadu ida nian, tan deit mundu ne'ebé *interconnected* ba bebeik.<sup>11</sup> Tanba ne'e, iha estudu estratéjiku hanorin buat ida katak iha formulasaun polítika defeza Estadu ida nian presiza hamosu rasionalizasaun ida klaru no koerente, tan bele hamosu impaktu ba polítika externa estadu ne'e nian. Tan iha *'boundary problem'* ka 'problema fronteira' entre polítika defeza no polítika externa.<sup>12</sup> Problema ne'e baibain iha teoria relasaun internasional refere ba buat ida bolu *security dilemma*, ne'ebé signifika katak bainhira Estadu ida tenta atu hadia ka hasa'e nia postura siguransa bele hamosu insiguransa husi Estadu seluk. Entaun, Estadu seluk sira ne'e bele senti ameasadu.<sup>13</sup> Bainhira mosu insiguransa iha Estadu viziñu sira, esplikasaun ne'ebé husi Timor-Leste maka ne'e katak programa Sidadania Sívika Patriota ne'e hodi hametin disiplina no hadok foin-sa'e sira husi lala'ok kriminal sira. Esplikasaun ne'e sei laforte naton hodi bele konvense, tan razaun ne'ebé sei esplika tuir mai ne'e.

Razaun seluk hamosu Sidadania Sívika Patriota ne'e maka atu kuda disiplina no hadok joven sira husi hahalok destrutivu sira. Ne'e bele los. Iha militar hanorin duni buat ida disiplina; tenki pontual no disiplina hodi ezekuta orden husi komandante sira. Atu kuda buat sira ne'e iha ema ida nia kakutak, la'os tenki liu deit husi serbisu obrigatóriu militar, buat sira nune'e bele hadia kedas deit husi familia uma-laran, eskola no iha comunidade. Atu muda mentalidade ema ida nian la'os akontese deit iha tinan rua ka tolu nia laran depende ba durasaun serbisu militar obrigatóriu nian, maibe ne'e presiza tempu naruk hahu husi inísiu kedas bainhira ema ne'e se iha inan nia kabun-laran to'o idade boot no moris iha comunidade nia laran. Disiplina militar nian obriga forsa sira hodi hatan "*pronto*" ka babain krítika sira dehan *blind obedience to commands* ba kualker instrusaun sadeit maka mai husi sira-nia superior. Iha mundu la'os militar nian, no tuir formasaun ema ne'ebé lolos hanorin ema atu disiplina maibe iha espasu mos ba argumentasaun ka rasionalizasaun. Ne'e hamosu ona kestaun kona-bá oinsa bele kuda disiplina maibe la hamate jogu kakutak iha argumentasaun ka rasionalizasaun nian? Iha ne'e la'os atu dehan mundu militar nian ne'e la rasional, maibe, aproximasaun militar nune'e bele mos lori impaktu ba foin-sa'e sira ne'e hodi re-integra ba comunidade hafoin hala'o tiha serbisu militar obrigatóriu.

---

<sup>11</sup>Robert Cooper, *The Postmodern State and the World Order* (London: Demos Foreign Policy Institute, 2<sup>nd</sup> edition, 2000), pp.4-22

<sup>12</sup> Wallace in Samuel Huntington, *The Common Defence, Strategic Programs in National Politics* (Columbia University Press, New York, 1961)

<sup>13</sup> Herz, John H. *Political Realism and Political Idealism*. Cambridge University Press, 1951.

Razaun ida tan kona-bá introdusaun programa Sidadania Sívika Patriota maka atu halakon númeru dezempregu. Iha problema tolu iha rasionalizasaun ida ne'e. Ida, konsidera fali F-FDTL hanesan SEPFOPE<sup>14</sup>. Rua, hanoin katak formasaun forsa defeza ne'e kustu kiik hela no, ikus liu, programa ne'e la interrompe ka la impede foin-sa'e sira nian.

Formasaun atu sai forsa defeza ne'e la'os hanesan formasaun ne'ebé SEPFOPE fo. Maski, durante formasaun iha forsa defeza aprende mos buat oi-oin hanesan lideransa, nsst, maibe, prioridade formasaun sira ne'e halai liu ba oinsa forsa defeza bele sai nu'udar instrumentu Estadu ba funu nian, ne'e maka objetivu prinsipal husi forsa defeza. Los duni, ema hotu-hotu sei empregadu tan deit programa Sidadania Sívika Patriota, maibe, kria implikasaun boot ida ba iha sustentabilidade ekonomia nasaun nian. Program Sidadania Sívika Patriota ne'e hasa'e deit despeza nasaun nian no sei la sustentável. Iha disiplina formulasaun política defeza nian, iha buat prinsipal tolu; interese estratéjiku, postura forsa no aliñamentu planu forsa ho kbiit finanseiru Estadu nian.<sup>15</sup> Atu formula política defeza ida koerente no klaru, presiza interaksaun diak entre fator tolu ne'e.

Iha kontextu Timor-Leste, susar tebe-tebes, karik la'os imposível, atu Estadu ne'e bele sustenta estrutura forsa defeza ida ne'ebé mai husi obrigatóriu. Molok atu tara mehi ne'e aas liu, presiza kompriende situasaun atual. Ohin-loron, iha problema barak no oi-oin iha esforsu dezenvolvimentu F-FDTL atu sai forsa ida ne'ebé professional no konvensional liu-liu problema orsamentu ne'ebé tun ba beibeik ba seitor defeza no siguransa. Ezemplu, iha tinan 2013, orsamentu ba Ministériu Defeza no Siguransa iha deit 0,4%<sup>16</sup>, husi total orsamentu ne'ebé kiik tiha ona sei aloka tan ba iha seitor siguransa nsst. Kompara ho Singapura ne'ebé aplika mos serbisu militar obrigatóriu gasta 1/4 husi total despeza Estadu kada-tinan ba seitor defeza.<sup>17</sup> Singapura sai nu'udar nasaun vensedor daruak kona-bá nível gastu iha defeza hafoin Israel.<sup>18</sup> Iha nasaun kiak sira, bainhira defeza boot bele lori impaktu negativu ba dezenvolvimentu seitor prinsipal sira seluk hanesan saúde no edukasaun.<sup>19</sup> Iha ona debate iha nasaun ne'ebé aplika programa ne'e atu halakon tiha programa ne'e tan hasa'e deit despeza nasaun nian. Imposível atu kompara situasaun dezenvolvimentu Timor-Leste ho Singapura ne'ebé avansadu liu ona iha seitor hotu-hotu. Tan ne'e, presiza defini programa ida ne'ebé realístiku ho situasaun real Timor-Leste nian.

---

<sup>14</sup> Sekretaria Estadu Política Formasaun Profesional no Empregu - SEPFOPE

<sup>15</sup> Francisco Lemos Dos Santos, *Tansá Timor-Leste Presiza Política Defeza Foun?*, bele asesu: <http://forum-haksasuk.blogspot.com/2012/08/tansa-timor-leste-presiza-politika.html>, artigu nemos publika iha jornal nasional sira.

<sup>16</sup> Mahein Nia Lian Nú. 45, 30 Janeiro 2013, *Analiza Orsamentu Jeral Estadu 2013 ba Ministériu Defeza no Siguransa: Prespetiva Sosiedade Sivil*, bele asesu:

<http://www.fundasaunmahein.org/2013/01/30/analiza-orsamentu-jeral-estadu-2013-ba-ministeriu-defeza-no-siguransa-prespetiva-sosiedade-sivil/>

<sup>17</sup> Sudhir Thomas Vadaketh, *Singapore's outdated national security policies*, bele asesu iha: <http://sudhirtv.com/2012/12/19/singapores-outdated-national-security-policies/>

<sup>18</sup> Bonn International Centre for Conversion, *UPDATE: BICC's Global Militarization Index (GMI) 2012*, bele asesu iha: <http://www.bicc.de/old-site/index.php?page=gmi-publications>

<sup>19</sup> Bonn International Centre for Conversion, *The Global Militarization Index(GMI), Occasional Paper*, bele asesu iha: <http://www.bicc.de/old-site/index.php?page=gmi-publications>

## Konkluzau

Introdusaun programa Sidadania Sívika Patriota ne'e hases ona kompetênsia Governu nu'udar orgaun exekutivu ne'ebé iha poder tomak hodi define polítika defeza ba Timor-Leste. Los duni katak PR maka Komandante Supremu F-FDTL, maibe, la signifika Komandante Supremu maka iha fali poder exekutivu hodi determina modelu forsa defeza nasaun nian.

Tuir prespetiva ekonomia no experiênsia nasaun sira seluk ne'ebé implementa programa ne'e katak serbisu militar obrigatóriu sei lori implikasaun ekonómiku ida boot tebe-tebes no programa ne'e bele sai fali impedimentu ba desenvolvimentu seitor prinsipal sira seluk. Iha mundu globalizadu ne'e, diferensa entre polítika externa no interna ne'e mihis tebe-tebes, no kuaze laiha diferensa liu-liu iha impaktu polítika iha rai-laran no rai-liur. Sidadania Sívika Patriota bele hamosu serbisu-uma ida ka "*Trabalho Para Casa - TPC*" diplomasia ida defisil tebe-tebes, tan programa ne'e bele provoca preokupasaun no insiguransa.

Programa ne'e iróniku oituan, tan laiha konsistensia entre polítika externa rekonsiliaun ne'ebé Timor-Leste adopta liu-liu ho Indonézia no programa Sidadania Sívika Patriota ne'ebé obriga kada Timor oan hotu-hotu atu sai militar. To'o ohin-loron, seidak iha ameasa konvensional ida dramátiku ne'ebé ejiji Estadu hodi dada ema hotu tama militar hodi defende soberania no integridade territorial Estadu RDTL. Diak liu, Casa Militar PR hamosu deit planu ida atu halo estudu ida kona-bá importânsia Timor-Leste define polítika defeza foun tan Planu Força 2020 mos lakon tiha ona relevânsia balu iha kontektu ohin-loron.

## Bibliografia

Bonn International Centre for Conversion, *UPDATE: BICC's Global Militarization Index (GMI) 2012*, bele assessu iha: <http://www.bicc.de/old-site/index.php?page=gmi-publications>

Bonn International Centre for Conversion, *The Global Militarization Index (GMI), Occasional Paper*, bele assessu iha: <http://www.bicc.de/old-site/index.php?page=gmi-publications>

Dokumentu Força 2020

Francisco Lemos Dos Santos, *Programa V Governu latemi kona-bá política defeza foun ba Timor-Leste!* bele assessu iha: <http://forum-haksesuk.blogspot.com/2012/12/programa-v-governu-latemi-kona-ba.html>

Herz, John H. *Political Realism and Political Idealism*. Cambridge University Press, 1951.

Jornal Independente, Segunda 15 Marsu 2012

Konstituisaun RDTL Versaun Tetum

Lei N.º 2 /2010 de 21 de Abril Lei de Segurança Nacional

Mahein Nia Lian Nú. 45, 30 Janeiru 2013, *Analiza Orsamentu Jeral Estadu 2013 ba Ministériu De*

*feza no Siguransa: Prespetiva Sosiedade Sivil*, bele asesu:

<http://www.fundasaunmahein.org/2013/01/30/analiza-orsamentu-jeral-estadu-2013-ba-ministeriu-defeza-no-siguransa-prespetiva-sosiedade-sivil/>

Office of the Presidency, Press Release First Debate on Compulsory Military Service, April 29 2013

Planu Estratéjiku Dezenvolvimentu Nasional – PEDN - 2011-2030

Programa V Governo Konstituisional Nian, 2012-2017

Robert Cooper, *The Postmodern State and the World Order* (London: Demos Foreign Policy Institute, 2<sup>nd</sup> edition, 2000), pp.4-22

Sudhir Thomas Vadaketh, *Singapore's outdated national security policies*, bele assessu iha: <http://sudhirtv.com/2012/12/19/singapores-outdated-national-security-policies/>

Wallace in Samuel Huntington, *The Common Defence, Strategic Programs in National Politics* (Columbia University Press, New York, 1961)